

L'APPLAUSI PI LI DEPUTATI

Un omu mentri chi durmìa,
Si sunnava ch'era mParaddisu
E nun canuscennu ancora, li lucali,
Stava cu l'animu suspisu.
Tuttu nto colpu si ntisi disturbatu,
Ci vinni di fari na cacata
E dumanna a l'apostulu san Petru:
Pi favuri, d'unné la ritirata?

San Petru c'indicau na nuvuletta,
All'uscita, propriu di rimpettu.
Nun c'essennu né mura, né silletta,
Dd'omu si calau e fici all'apertu;
Quannu lu strunzu si distaccau di l'anu,
Ci foru applausi e battuti di manu.

Quannu fù di novu disturbatu,
Dd'omu siguìu lu stessu passu,
Fici n'autru strunzu, spillungatu,
Grossu, tunnu a raggiu di cumpassu:
E quannu lu sforzu superau l'eclissi,
Un ci fu tempu di stuiarisi lu retru,
Chi di l'applausi ripiteru u bissi.
Dd'omu curiusu dumannau a san Petru.

San Petru ci dissi: Amicu beddu,
Sta nuvuletta dunni tu cacasti,
Stà supra la Capitali pi cappeddu
E ad ogni strunzu chi ci scoppa di luntanu,
C'è sempri festa e battuti di manu!

MUNNU SCILLIRATU

Tutti, comu li pisci di lu mari,
La stessa liggi, senza diffirenza,
Lu pisciteddu nicu, c'havi a fari
Contru lu grossu, quantu na putenza.
Si nun lu viri lu grossu, a lu passari,
Va capita chi mori cu la lenza
E si di l'amu scappa a lu vuccagghiu,
Finisci chi va mori nto rizzagghiu.

Poviru nicu, misiru e afflittu,
Nta stu munnu, chi ci campi a fari?
Manci picca, tintu, malirittu,
Nuddu chi ti veni a cunzulari;
T'affanni la vita, ti cunzumi,
Comu lu pappagghiuni nta lu lumi.

NUN S'ARRAGGIUNA CCHIU'

Lavuratura chi v'inniti a travagghiari,
A la matina facitivi lu cuntu,
Chista è l'epuca di cu sapi ntrallazzari,
Di cu nun havi virgogna e mancu affruntu.
Stu mali sempri v`a a multiplicari,
È tutta virità soccu vi cuntu,
Cu travagghia perdi e v`a di facci
Picchè è l'epuca di li vili e li magnacci.

LA CUGGHIUNIATA

Successi duranti na iurnata:
N' autu chi passa e stà a strillari
Cu l' altu parlanti, a avvissari
Di un cumiziu e di na chiacchiarata.
E curri versu lu Diputatu,
Tuttu lu paisi e la cuntrata,
Pi sentiri la liggi ch' è approvata
O li prugetti rigiunali di lu Statu.

E dopu parlatu e riparlatu:
Lavuru e pani ai lavuraturi
Reprimennu a chiddi usurpaturi;
Lu lavuru havi a essiri apprizzatu.
Lu populu acclama suddisfattu
A sentiri lu divinu Diputatu:
Lu lavuru v`a risuscitatu!
Lu cunzirvaturi v`a disfattu!
Lu populu è suddisfattu di dda parlata.
Nun s' addunau chi f`u na cugghiuniata!

LI PECURI

Chi vuliti chi ci sia dintra na menti,
È comu na suprascritta di giornali,
Cu tanti articoli, tutti diffirenti,
Cu parla di beni, cui di mali,
C'è qualchi testu ncisu anticamenti,
Chi si rispetta a carattiri mundiali;
Nta la pagina di lu liuni chi ci stà?
Rispiitari la suvranaità!

La pagina di la pecura è cchiù sana,
C'è cchiù articoli e dici lu cchiu' bellu
Furmaggiu, agneddi, pura lana
E quannu è vecchia poi, peddi e macellu.
Lu dissi lu Rè, lu dissi la Suvrana:
Notti e gghiornu rispunniri all'appellu,
Chi di la lana c'è lu vistitu cchiù perfettu
E agneddi e ricotta pi un nobili banchettu.

E la pecura ammaledda s'incamina
Nta la vicchiaia versu lu macellu,
Ha statu l'artefici di la disciplina
E rispunni c'un sulu mè,
Comu di restu,
Comu fà tutta la razza picurina.

COSA MMARAZZATA

Un omu scinziatu baluardu,
Parlannu di quatrupedi nvinziuni,
Dicia chi di na tigri e un liuni,
Pò nasciri un essiri bastardu.
Infatti quannu un essiri tistardu
Si storci, attesta e si prupuni,
Ncucchiannusi cu na fimmina diversa,
È facili nasciri un cugghiuni.

Criu chi nun è sinceru e mancu chiaru,
Basta taliari l'amministrazioni,
Ci sù tri essiri chi si ncucchiaru
E chi stufatu chi nni cumminaru;
Un PC, un biculuri, un livantinu.
Vabbeni chi pi ogni tuppa c'è na chiavi,
Ma è comu taliari un rettili scacchiatu,
Nun si capisci chi culuri havi.

LU SINDACALISTA

Chi ni pinzati di lu sindacalista?
Vi metti nnanzi a tuttu l'arritrati,
L'incassi, li tassi chi pagati,
Li novi liggi vi li dici a vista,
Fà li veci di lu macchinista,
Vi guida nta li curvi e l'acchianati.

Lavura pi lu partitu, sì lavura,
Ti scrivi la dumanna e sta a vidìri
Si è riali oppuru frigatura,
Voli l'accuntu, trenta milaliri,
Lavura pi l'ideali, nun ce cchi diri;
Lu travagghiu lu pisa ca balanza;
Tessira dumanna, e l'ideali
Si lu cuncentra cu la matri panza.

LI PRUDIGI DI LU ATTU

Ficiru un ghiornu na prutesta,
L'armali chi suffrianu di panza,
Vulianu rispittata l'uguaglianza.
Sciglieru un gattu e lu misitu a la testa,
Pi stu attu putìri prisintari,
A lu liuni, rè di la foresta,
A nomu di tuttu lu cumitatu,
I diritti di lu proletariatu.

Lu attu s'introduci nta lu liuni
Pi li prugetti di li sò cumpagni.
Talia li mura, l'anguli e timpagni,
S'arriffa lu nasu e lu baffuni,
Vitti carni, càlia, castagni,
Ci vinni francu un pezzu di pulmuni.
Appi l'alloggiu pi la rapprisintanza,
Mangia, vivi e s'arricrìa la panza!

Lu gattu mentri esponi l'ambasciata
Di l'armali afflitti e puvireddi,
S'attrappa cu la granfa un centu peddi
Spirannu un pezzu tennaru curata.
Aspettanu l'armali u risultatu;
Lu attu chi li iu a rapprisintari,
Dda dormi, vivi e stà abbaffatu,
Veni quannu finisci di rusicari.

Nta la giungla chi nni penzanu l'armali,
Grossi, mizzalini e picciriddi?
Stannu oltrepassannu la murali,
Si mpettanu e si mangianu fra iddi.
L'incaricu lu attu nun lu prupuni,
Dda mangia, vivi e stà abbuffatu,
Va d'accordu, nun si lamenta du liuni,
Nun pensa cchiù l'armali c'ha lassatu,
Pensa ddu centu peddi e ddu pulmuni!

Nun veni l'uguaglianza mancu nsonnu,
Mancu cu li lenticchi e ministruni,
Ti sonni beddi cosi tutti attornu,
T'attrappi, ti sciarrii cu li pirsuni,
Senti càrbu, nun pòi digiriri.
Ti sonni un sceccu c'havi l'ali,
Ninuzza chi ti fà qualchi piacìri,
Tò figghia chi s'abbrazza un capurali,
La sorti chi ti viri e chi ti sviri,
Nto sonnu chi ti fannu ginirali,
Ti sonni tutta la scenza e la ngnuranza,
Ma nun ti pòi sunnari l'uguaglianza!

LU SCECCU A LU SINATU

Pinsaru un ghiornu, tutti l'animali,
Di vuliri furmari un cumitatu,
Pi un dicretu a carattiri naziunali
A sullivamentu di lu prulitariatu.

Ntirvinni lu liuni,
Lu cervu ncurnacchiatu,
Lu cavaddu mbizzarritu,
Lu corvu mascariatu,
L'orsu tiku tiku,
Lu sirpenti scacchiatu,
L'elefanti cu l'amicu,
Lu cunigghiu nfattariatu.

E dopu la pantera,
Lu gurilla, lu scimmiuni,
La zebra e parintera,
Un granni esercituni
Di armali, manzueti,
Bizzarri, nferuciti,
Di tutti li cuntrati
E di tutti li partiti.

Ddopu chi furmaru
Lu dicretu pi l'elettu,
Vittiru spuntari
Un sceccu c'un carrettu.

Ci dissiru chi voi?
Vogghiu iri a lu Sinatu!
Pi cchistu fici u carricu
E sugnu ncravattatu.

Risposi lu liuni,
L'aquila e lu beccu:
Ma nun è mai possibili
A lu Sinatu un sceccu!
Comu si pò mettiri
Nto ntavulinu stranu,
U sceccu disignatu,
Cu carta e pinna mmanu?

Riuneru lu cunzigghiu
E tutti decretaru:
Pi cunchiuriri lu numaru
Ddu sceccu l'assittaru.